

南方草木狀

南方草木状

南方草木狀目錄

卷上

草類

甘蕉

耶悉茗

末利

豆蔻花

山薑花

鶴草

甘藷

水蓮

水蕉

蒟醬

菖蒲

留求子

諸蔗

草麴

芒茅

肥馬草

冬葉

蒲葵

乞力伽

楨桐

水葱

蕪菁

菘附

茄

綽菜

薤

冶葛

吉利草

良耀草

蕙

卷中

木類

楓人

楓香

薰陸香

榕

益智子

桂

朱槿

指甲花

蜜香

沈香

雞骨香

黃熟香

棧香

青桂香

馬蹄香

雞舌香

桃榔

訶梨勒

蘇枋

水松

刺桐

棹

杉

荆

紫藤

榼藤

蜜香紙

抱香履

卷下

果類

檳榔

荔枝

椰

楊梅

橘

柑

橄欖

龍眼

海棗

于歲子

五斂子

鉤緣子

海梧子

海松子

菴摩勒

石栗

人面子

竹類

雲亾竹

箴筭竹

石林竹

思摩竹

簞竹

越王竹

南方草木狀目錄終

南方草木狀卷上

并序

齊羣士二房子振聲襄陽太守嵇含撰

南越交趾植物有四裔最爲奇周秦以前無稱焉自漢武帝開拓封疆搜來珍異取其尤者充貢中州之人或昧其狀乃以所聞詮敘有裨子弟云爾

甘蕉望之如樹株大者一圍餘葉長一丈或七八尺廣尺餘二尺許花大如酒杯形色如芙蓉著莖末百餘子大名爲房相連

累甜美亦可蜜藏根如芋魁大者如車轂
實隨華每華一闔各有六子先後相次子
不俱生花不俱落一名芭蕉或曰巴苴剝
其子上皮色黃白味似蒲萄甜而脆亦療
飢此有三種子大如拇指長而銳有類羊
角名羊角蕉味最甘好一種子大如雞卵
有類牛乳名牛乳蕉微減羊角一種大如
藕子長六七寸形正方少甘最下也其莖
解散如絲以灰練之可紡績爲絺綌謂之

蕉葛雖脆而好黃白不如葛赤色也交廣俱有之三輔黃圖曰漢武帝元鼎六年破南越建扶荔宮以植所得奇草異木有甘蕉二本

耶悉茗花末利花皆胡人自西國移植於南海南人憐其芳香競植之陸賈南越行紀曰南越之境五穀無味百花不香此二花特芳香者緣自胡國移至不隨水土而變與夫橘北爲枳異矣彼之女子以綵絲

穿花心以爲首飾

末利花似薔藤之白者香愈於耶悉茗

豆蔻花其苗如蘆其葉似薑其花作穗嫵
葉卷之而生花微紅穗頭深色葉漸舒花
漸出舊說此花食之破氣消痰進酒增倍
泰康二年交州貢一筐上試之有驗以賜
近臣

山薑花莖葉卽薑也根不堪食於葉間吐
花作穗如麥粒軟紅色煎服之治冷氣甚

效出九真交趾

鶴草蔓生其花麴塵色淺紫蒂葉如柳而短當夏開花形如飛鶴觜翅尾足無所不備出南海云是媚草上有蟲老蛻爲蝶赤黃色女子藏之謂之媚蝶能致其夫憐愛甘藷蓋薯蕷之類或曰芋之類根葉亦如芋實如拳有大如甌者皮紫而肉白蒸鬻食之味如薯蕷性不甚冷舊珠崖之地海中之人皆不業耕稼惟掘地種甘藷秋熟

收之蒸曬切如米粒倉圖貯之以充糧糗
是名儲糧北方人至者或盛具牛豕膾炙
而末以甘藷薦之若粳粟然大抵南人二
毛者百無一二惟海中之人壽百餘歲者
由不食五穀而食甘藷故爾

花之美者有水蓮如蓮而莖紫柔而無刺
水蕉如鹿葱或紫或黃吳永安中孫休嘗
遣使取二花終不可致但圖畫以進

蒟醬華芡也生於蕃國者大而紫謂之華

莠生於番禺者小而青謂之莠焉可以調食故謂之醬焉交趾九真人家多種蔓生苜蒲番禺東有潤潤中生苜蒲皆一寸九節安期生採服仙去但留玉舄焉

留求子形如梔子稜瓣深而兩頭尖似訶梨勒而輕及半黃已熟中有肉白色甘如棗核大治嬰孺之疾南海交趾俱有之諸蔗一曰甘蔗交趾所生者圍數寸長丈餘頗似竹斷而食之甚甘竿取其汁曝數

日成飴入口消釋彼人謂之石蜜吳孫亮使黃門以銀椀并蓋就中藏吏取交州所獻甘蔗飴黃門先恨藏吏以鼠屎投飴中啓言吏不謹亮呼吏持飴器入問曰此器旣蓋之且有油覆無緣有此黃門將有恨汝吏叩頭曰嘗從臣求莞席臣以席有數不敢與亮曰必是此問之具服南人云甘蔗可消酒又名干蔗司馬相如樂歌曰太尊蔗漿折朝醒是其義也泰康六年扶南

國貢諸蔗一丈三節

草麴南海多美酒不用麴蘖但杵米粉雜以衆草葉冶葛汁滌漉之大如卵置蓬蒿中蔭蔽之經月而成用此合糯爲酒故劇飲之旣醒猶頭熱涔涔以其有毒草故也南人有女數歲卽大釀酒旣漉候冬陂池竭時寘酒罌中密固其上瘞陂中至春漚水滿亦不復發矣女將嫁乃發陂取酒以供賀客謂之女酒其味絕美

芒茅枯時瘴疫大作交廣皆爾也土人呼
曰黃茅瘴又曰黃芒瘴

南方冬無積藁瀕海郡邑多馬有草葉類
梧桐而厚取以秣馬謂之肥馬草馬頗嗜
而食果肥壯矣

冬葉薑葉也苞苴物交廣皆用之南方地
熱物易腐敗惟冬葉藏之乃可持久

蒲葵如柝欄而柔薄可爲葵笠出龍川
藥有乞力伽木也瀕海所產一根有至數

斤者劉涓子取以作煎令可丸餌之長生
蘋桐花嶺南處處有自初夏生至秋蓋草
也葉如桐其花連枝萼皆深紅之極者俗
呼貞桐花貞音訛也

水葱花葉皆如鹿葱花色有紅黃紫三種
出始興婦人懷妊佩其花生男者卽此花
非鹿葱也交廣人佩之極有驗然其土多
男不厭女子故不常佩也

蕪菁嶺嶠已南俱無之偶有士人因官攜

種就彼種之出地則變爲芥亦橘種江北
爲枳之義也至曲江方有菘彼人謂之秦
菘

茄樹交廣草木經冬不衰故蔬圃之中種
茄宿根有三五年者漸長枝幹乃成大樹
每夏秋盛熟則梯樹採之五年後樹老子
稀卽伐去之別栽嫺者

綽菜夏生於池沼間葉類茨菰根如藕條
南海人食之云令人思睡呼爲瞑菜

薤葉如落葵而小性冷味甘南人編葦爲
筏作小孔浮於水上種子於水中則如萍
根浮水面及長莖葉皆出於葦筏孔中隨
水上下南方之奇蔬也治葛有大毒以薤
汁滴其苗當時萎死世傳魏武能噉治葛
至一尺云先食此菜

治葛毒草也蔓生葉如羅勒光而厚一名
胡蔓草實毒者多雜以生蔬進之悟者速
以藥解不爾半日輒死山羊食其苗卽肥

而大亦如鼠食巴豆其大如独蓋物類有相伏也

吉利草其莖如金釵股形類石斛根類芍藥交廣俚俗多蓄蠱毒惟此草解之極驗吳黃武中江夏李僕以罪徙合浦始入境遇毒其奴吉利者偶得是草與僕服遂解吉利卽遁去不知所之僕因此濟人不知其數遂以吉利爲名豈李僕者徙非其罪或僕自有隱德神明啓吉利者救之耶

良耀草枝葉如麻黃秋結子如小粟煨食之解毒功用亞於吉利始者有得是藥者梁氏之子耀亦以爲名梁轉爲良爾花白似牛李出高涼

蕙草一名薰草葉如麻兩兩相對氣如麝燕可以止癘出南海

凡草木之華者春華者冬秀夏華者春秀秋華者夏秀冬華者秋秀其華竟歲故婦女之首四時未嘗無華也

南方草木狀卷上

南方草木狀卷中

楓人五嶺之間多楓木歲久則生瘤癭一
夕遇暴雨驟雨其樹贅暗長三五尺謂之
楓人越巫取之作術有通神之驗取之不
以法則能化去

楓香樹似白楊葉圓而歧分有脂而香其
子大如鴨卵二月華發乃著實八九月熟
曝乾可燒惟九真郡有之

薰陸香出大秦在海邊有大樹枝葉正如

古松生於沙中盛夏樹膠流出沙上方採之

榕樹南海桂林多植之葉如木麻實如冬青樹幹拳曲是不可以爲器也其本稜理而深是不可以爲材也燒之無焰是不可以爲薪也以其不材故能久而無傷其蔭十畝故人以爲息焉而又枝條旣繁葉又茂細軟條如藤垂下漸漸及地藤梢入土便生根節或一大株有根四五處而橫枝

及鄰樹卽連理南人以爲常不謂之瑞木
益智子如筆毫長七八分二月花色若蓮
著實五六月熟味辛雜五味中芬芳亦可
鹽曝出交趾合浦建安八年交州刺史張
津嘗以益智子粽餉魏武帝

桂出合浦生必以高山之巔冬夏常青其
類自爲林間無雜樹交趾置桂園桂有三
種葉如柏葉皮赤者爲丹桂葉似柿葉者
爲菌桂其葉似枇杷葉者爲牡桂三輔黃

圖曰甘泉宮南有昆明池池中有靈波殿以桂爲柱風來自香

朱槿花莖葉皆如桑葉光而厚樹高止四五尺而枝葉婆娑自二月開花至中冬卽歇其花深紅色五出大如蜀葵有藥一條長於花葉上綴金屑日光所爍疑若焰生一叢之上日開數百朶朝開暮落插枝卽活出高涼郡一名赤槿一名日及指甲花其樹高五六尺枝條柔弱葉如嬾

榆與耶悉茗末利花皆雪白而香不相上下亦胡人自大秦國移植于南海而此花極繁細纔如半米粒許彼人多折置襟袖間蓋資其芬馥爾一名散沫花

蜜香

沈香

雞骨香

黃熟香

棧香

青桂香

馬蹄香

雞舌香

案此八物同出於一樹也交趾有蜜香樹榦似拒柳其花白而繁其葉如橘欲取香

伐之經年其根榦枝節各有別色也木心與節堅黑沈水者爲沈香與水面平者爲雞骨香其根爲黃熟香其榦爲棧香細枝緊實未爛者爲青桂香其根節輕而大者爲馬蹄香其花不香成實乃香爲雞舌香珍異之木也

桄榔樹似桤櫚實其皮可作纆得水則柔韌胡人以此聯木爲舟皮中有屑如麪多者至數斛食之與常麪無異木性如竹紫

黑色有文理工人解之以製弈枰出九真
交趾

訶梨勒樹似木椀花白子形如橄欖六路
皮肉相著可作飲變白髭髮令黑出九真
蘇枋樹類槐花黑子出九真南人以染絳
漬以大庾之水則色愈深

水松葉如檜而細長出南海土產眾香而
此木不大香故彼人無佩服者嶺北人極
愛之然其香殊勝在南方時植物無情者

也不香於彼而香於此豈屈於不知己而伸於知己者歟物理之難窮如此

刺桐其木爲材三月三時布葉繁密後有花赤色間生葉間旁照他物皆朱殷然三五房凋則三五復發如是者竟歲九真有之

棹樹榦葉俱似椿以其葉鬻汁漬果呼爲棹汁若以棹汁雜彘肉食者卽時爲雷震死棹出高涼郡

杉一名披黏合浦東二百里有杉一樹漢安帝永初五年春葉落隨風飄入洛陽城其葉大常杉數十倍術士廉盛曰合浦東杉葉也此休徵當出王者帝遣使驗之信然乃以千人伐樹役夫多死者其後三百人坐斷株上食過足相容至今猶存

荆寧浦有三種金荆可作枕紫荆堪作牀白荆堪作履與他處牡荆蔓荆全異又彼境有杜荆指病自愈節不相當者月暈時

刻之與病人身齊等置牀下雖危困亦愈
紫藤葉細長莖如竹根極堅實重重有皮
花白子黑置酒中歷二三十年亦不腐敗
其莖截置煙灸中經時成紫香可以降神
榼藤依樹蔓生如通草藤也其子紫黑色
一名象豆三年方熟其殼貯藥歷年不壞
生南海解諸藥毒

蜜香紙以蜜香樹皮葉作之微褐色有紋
如魚子極香而堅韌水漬之不潰爛秦康

五年大秦獻三萬幅常以萬幅賜鎮南大將軍當陽侯杜預令寫所撰春秋釋例及經傳集解以進未至而預卒詔賜其家令藏之

抱香履抱木生於水松之旁若寄生然極柔弱不勝刀鋸乘溼時剗而爲履易如削瓜旣乾則韌不可理也履雖猥大而輕者若通脫木風至則隨飄而動夏月納之可禦蒸溼之氣出扶南大秦諸國泰康六年

扶南貢百雙帝深歎異然哂其制作之陋
但置諸外府以備方物而已按東方朔瑣
語曰木履起於晉文公時介之推逃祿自
隱抱樹而死公撫木哀歎遂以爲履每懷
從亡之功輒俯視其履曰悲乎足下足下
之稱亦自此始也

南方草木狀卷中

南方草木狀卷下

檳榔樹高十餘丈皮似青桐節如桂竹下
本不大上枝不小調直亭亭千萬若一森
秀無柯端頂有葉葉似甘蕉條派開破仰
望眇眇如插叢蕉於竹杪風至獨動似舉
羽扇之掃天葉下繫數房房綴數十實實
大如桃李天生棘重累其下所以禦衛其
實也味苦澀剖其皮鬻其膚熟如貫之堅
如乾棗以扶留藤古賁灰并食則滑美下

氣消穀出林邑彼人以爲貴婚族客必先
進若邂逅不設用相嫌恨一名賓門藥餞
荔枝樹高五六丈餘如桂樹綠葉蓬蓬冬
夏榮茂青華朱實實大如雞子核黃黑似
熟蓮實白如肪甘而多汁似安石榴有甜
酢者至日將中翕然俱赤則可食也一樹
下子百斛三輔黃圖曰漢武帝元鼎六年
破南越建扶荔宮扶荔者以荔枝得名也
自交趾移植百株于庭無一生者連年移

植不息後數歲偶一株稍茂然終無華實
帝亦珍惜之一旦忽萎死守吏坐誅死者
數十遂不復茂矣其實則歲貢焉郵傳者
疲斃於道極爲生民之患

椰樹葉如柝櫚高六七丈無枝條其實大
如寒瓜外有麤皮次有殼圓而且堅剖之
有白膚厚半寸味似胡桃而極肥美有漿
飲之得醉俗謂之越王頭云昔林邑王與
越王有故怨遣俠客刺得其首懸之于樹

俄化爲椰子林邑王憤之命剖以爲飲器
南人至今效之當刺時越王大醉故其漿
猶如酒云

楊梅其子如彈丸正赤五月中熟熟時似
梅其味甜酸陸賈南越行紀曰羅浮山頂
有胡楊梅山桃繞其際海人時登採拾止
得於上飽噉不得持下東方朔林邑記曰
林邑山楊梅其大如杯椀青時極酸旣紅
味如崖蜜以醞酒號梅香酎非貴人重客

不得飲之

橘白華赤實皮馨香有美味自漢武帝交趾有橘官長一人秩二百石主貢御橘吳黃武中交趾太守士燮獻橘十七實同一蒂以爲瑞異羣臣畢賀

柑乃橘之屬滋味甘美特異者也有黃者有赭者赭者謂之壺柑交趾人以席囊貯蟻鬻於市者其窠如薄絮囊皆連枝葉蟻在其中并窠而賣蟻赤黃色大于常蟻南

方柑樹若無此蟻則其實皆爲羣蠹所傷
無復一完者矣今華林園有柑二株遇結
實上命羣臣宴飲于旁摘而分賜焉

橄欖樹身聳枝皆高數丈其子深秋方熟
味雖苦澀咀之芬馥勝含雞骨香吳時歲
貢以賜近侍本朝自泰康後亦如之

龍眼樹如荔枝但枝葉稍小殼青黃色形
圓如彈丸核如木椀子而不堅肉白而帶
漿其甘如蜜一朶五六十顆作穗如蒲萄

然荔枝過卽龍眼熟故謂之荔枝奴言常隨其後也東觀漢記曰單于來朝賜橙橘龍眼荔枝魏文帝詔羣臣曰南方果之珍異者有龍眼荔枝合歲貢焉出九真交趾海棗樹身無閑枝直聳三四十丈樹頂四面共生十餘枝葉如柝欄五年一實實甚大如杯盃核兩頭不尖雙卷而圓其味極甘美安邑御棗無以加也泰康五年林邑獻百枚昔李少君謂漢武帝曰臣嘗遊海

上見安期生食臣棗大如瓜非誕說也

干歲子有藤蔓出土子在根下鬚綠色交
加如織其子一苞恆二百餘顆皮殼青黃
色殼中有肉如栗味亦如之乾者殼肉相
離撼之有聲似肉豆蔻出交趾

五斂子大如木瓜黃色皮肉脆軟味極酸
上有五稜如刻出南人呼稜爲斂故以爲
名以蜜漬之甘酢而美出南海

鉤緣子形如瓜皮似橙而金色胡人重之

極芬香肉甚厚白如蘆菔女工競雕鏤花
烏漬以蜂蜜點燕檀巧麗妙絕無與爲比
泰康五年大秦貢十缶帝以三缶賜王愷
助其珍味夸示於石崇

海梧子樹似梧桐色白葉似青桐有子如
大栗肥甘可食出林邑

海松子樹與中國松同但結實絕大形如
小栗三角肥甘香美亦尊俎間佳果也出
林邑

菴摩勒樹葉細似合昏花黃實似李青黃色核圓作六七棱食之先苦後甘術士以變白鬚髮有驗出九真

石栗樹與栗同但生於山石罅間花開三年方結實其殼厚而肉少其味似胡桃人熟時或爲羣鸚鵡至啄食略盡故彼人極珍貴之出日南

人面子樹似含桃結子如桃實無味其核正如人面故以爲名以蜜漬之稍可食以

其核可玩於席間飭餽禦客出南海

雲丘竹一節爲船出扶南然今交廣有竹節長二丈其圍一二丈者往往有之

魚筭竹皮薄而空多大者徑不過二寸皮麤澀以鏘犀象利勝於鐵出大秦

石林竹似桂竹勁而利削爲刀割象皮如切芋出九眞交趾

思摩竹如竹大而筍生其節筍旣成竹春而筍復生節焉交廣所在有之

簞竹葉疏而大一節相去六七尺出九眞
彼人取嫵者礎浸紡績爲布謂之竹疏布
越王竹根生石上若細荻高尺餘南海有
之南人愛其青色用爲酒籌云越王棄餘
筭而生竹

南方草木狀卷下

南方草木狀三卷晉嵇含撰直齋書錄解題文獻通考始見著錄竝一卷宋志卷與今本同隋唐志俱不載別有含集十卷或此書本在集中集亡不可考矣隋志於含集題廣州刺史書錄通考則稱襄陽太守四庫題要從明胡文煥跋以書中多載嶺表之物故主隋志之題更誤爲廣州太守按晉書含附嵇紹傳永興初爲范陽王虓從事中郎尋授振威將軍襄城太守後依

劉弘於襄陽弘表爲平越中郎將廣州刺史假節未發爲郭勦所殺是含之爲太守實在襄城及授刺史未嘗身履其地葛洪傳言洪參廣州刺史嵇含軍事及含遇害遂留南土則似含曾之官卒於廣者兩傳各異乃修史者之疏而考證事實要以本傳爲斷據舊題書成於永興元年其時含固在滎陽襄城之間自序本云以所聞詮敘豈必目驗諸物而後操觚況復傳錄異

聞未盡可睹邪永興改元在十二月丁亥
提要推勘極審舊題漫以襄城爲襄陽十
二月爲十一月意必傳寫之訛含字君道
自號毫邱子晉書抱朴子竝同胡跋謂爲
悅道亦未深考此書敘述典雅詞旨雋逸
後世譜錄詩詞多見徵引信非出於依託
近代所傳以宋麻沙本爲最古然不易得
漢魏格致二本舛訛皆數十處如可以調
食誤謂食無緣有此誤於此亦以爲名謬

爲言梅香耐誤梅香耐一字之差文義遂
梗又闕海松子一條竝其目亦失載獨百
川本字句完善卷首詳載年月仕履一仍
舊式參校數過用付寫刊雖非宋本面目
精神或不相遠也丙辰重九吳江沈兆奎
跋